

## **Infurmaziuns radunanza cumünela 29 gün 2022**

# **Finanzas intactas, sustegn pel „Digital Customer Journey“ ed aunch'üngün nouv Uorden da Chalandamarz**

**La radunanza cumünela da Zuoz ho in marculdi ils 29 gün 2022 approvo il rendaquint 2021 unanimamaing e delibero ün credit per la prefinanziaziun dal „Digital Customer Journey“. Il nouv Uorden da Chalandamarz vain trat inavous.**

62 votantas e votants haun visito la radunanza cumünela da Zuoz, chi'd es eir darcho gnida transmissa per „livestream“ sur YouTube per perseguiter dad a chesa.

Il rendaquint serra giò l'an da gestiun 2021 cun ün resultat allegraivel. Que ho da che fer culla buna disciplina da büdschet tar las expensas, guardo sur tuot ils decasteris e l'administraziun cumünela. Ma eir cun entredgias d'impostas, chi sun considerabelmaing pü otas scu previsas. Il quint annuel 2021 serra cun ün suravaunz dad entredgias da CHF 13'806.32. Que zieva investiziuns nettas da CHF 3.66 milliuns, amortisaziuns ordinaras ed extraordinarias ill'otezza da totelmaing CHF 2.97 milliuns ed ün import da CHF 3.3 milliuns miss inavous per ils obligs chi vegnan per la sanaziun da la chesa da fliamaint Promulins a Samedan. La radunanza approva unanimamaing il rendaquint 2021 cun ün Cash-Flow da CHF 5.35 milliuns.

La dumanda per ün credit da CHF 102'600.00 per la prefinanziaziun dal proget turistic „Digital Customer Journey“, la digitalisaziun da l'experienza turistica in Engiadin'Ota, approva la radunanza cumünela sainza cunter vuschs e demuossa uschè il sustegn per la collavuraziun regiunela sül champ turistic.

Zieva sur 15 ans ho il cussagl cumünel suottamiss a la radunanza cumünela üna proposta per ün nouv Uorden da Chalandamarz. Ils müdamaints principels pertuochan la partecipaziun da las mattas e la gestiun dal schlupper la geischla. La discussiun da la radunanza cumünela es steda früttaivla e disciplineda. La proposta nun es finelmaing gnida suottamissa ad üna votaziun. Il cussagl cumünel sur elavurescha aunch'üna vouta il cuntegn, piglia sü ils tschegns constructivs our da la radunanza e suottametta la varianta finela ad üna prosma radunanza cumünela.

Sar cusglier Romeo Cusini ho passanto si'ultima radunanza cumünela scu commember dal cussagl cumünel. I'l nom da la vschinauncha da Zuoz ho il president cumünel Andrea Gilli ingrazcho per la lavur prasteda e piglio cumgio da sar Romeo Cusini.

Zuoz, 29.06.2022/PS